

ҚОР МАҢЫЗДЫ САЛАЛАРҒА ТЫҢ СЕРПІН БЕРЕДІ



Мемлекет басшысы «Қазақстан халқына» қорының төрағасы Болат Жәмішевті қабылдады.

Президентке қор 2022 жылы қантарда құрылған уақыттан бері қайырымдылық жасаудың тұрақты моделін ұлттық ауқымда қалыптастырғаны туралы мәлімет берілді.

Қор ашықтық, есептілік, заңдылық және тұрақтылық секілді қоғамдық қаржыны басқарудың негізгі қағидаттарын сақтайды және еліміздегі қайырымдылық экожүйесінің дамуына елеулі үлес қосады.

Қордың жұмысы жалпы жұртшылықтың сенім мандатына негізделген.

Қордың қайырымдылық жобалары мен бағдарламалары қоғам өмірінің маңызды салаларына айтарлықтай әсер етеді және көбіне олардың дамуына тың серпін береді.

Болат Жәмішевтің айтуынша, қор азаматтарымыздың денсаулық сақтау, білім беру, әлеуметтік қолдау, мәдениет және спорт салаларындағы негізгі мәселелерін шешуге бағытталған жалпы сомасы 146,5 миллиард тенге болатын 40-тан астам қайырымдылық бағдарлама мен жобаны қаржыландырады. Сондай-ақ төтенше жағдайлар кезінде зардап шеккен азаматтарға көмек көрсетіледі. Қордың бағдарламалары ауылдық елді мекендер мен шағын қалаларға басымдық бере отырып, еліміздің барлық өңірлерінде жүзеге асырылады.

Қордың ең ірі бағдарламасы – өмірге қауіп төндіретін және орфанды (сирек) аурумен ауыратын науқастар үшін дәрілік препараттарды

сатып алу. 324 қазақстандық (оның 243-і балалар) үшін 24,9 миллиард тенге көлемінде дәрілік заттардың 36 түрі, сондай-ақ Қазақстанға алғаш рет жеті препарат, оның ішінде әлемдегі ең қымбат «Золгенсма» дәрісі сатып алынды. Қордың қолдауының нәтижесінде елімізде тірек мектептер жүйесі (80 мектеп), ауылдағы, әсіресе аз жабдықталған мектептердегі білім деңгейін арттыру үшін құзыреттілік орталықтары құрылды.

Қор мүмкіндігі шектеулі, аз қамтылған және ауылдан шыққан талапкерлердің жоғары білім алу мүмкіндігін қамтамасыз етеді. Республика бойынша 2200-ден астам студент «Қазақстан халқына» қорының гранттары мен стипендиясының иеленген. Ауылдарда спортпен айналысатын залдардың тапшылығы мен қолжетімсіздігін ескеріп, қордың қолдауымен ауыл жастарына арналған 24 спорт залы ашылды. Қазіргі таңда 76 залды іске қосу жұмыстары жалғасады.

Ерекше балаларға арналған оңалту орталықтарын құру бойынша ауқымды жұмыс жүргізіліп жатыр. Жалпы 4 ерте араласу орталығы және аутизм мен басқа да ақыл-ой ауытқушылығы бар балаларға арналған 4 орталық ашылды. 13 орталықты ашу жұмыстары жүргізілуде.

15 тамыздан бастап қордың бастамасымен «Өңірлерге арналған қор» атты ұлттық қайырымдылықтың ІІ конференциясы басталды. Еліміздің барлық аймағында дөңгелек үстел форматында өңірлердің қажеттіліктері мен ерекшеліктерін ескере отырып, жүзеге асыруға ұсынылатын бастамалар талқыланып, жобалар айқындалады. Әзірленген ұсыныстар 2024 жылы «Қазақстан халқына» қорының қызметінде басшылыққа алынады.

АСТАНА АЛДАҒЫ ЖЫЛЫТУ МАУСЫМЫНА ДАЙЫН

Мемлекет басшысы Астана қаласының әкімі Жеңіс Қасымбекті қабылдады.



Қасым-Жомарт Тоқаевқа елорданың әлеуметтік-экономикалық және инфрақұрылымдық дамуы жөнінде есеп берілді.

Президентке барлық негізгі экономикалық көрсеткіш бойынша оң динамика байқалатыны жайында мәлімет берілді. Биылғы 7 айда инвестиция көлемі 9,2 пайызға ұлғайып, 678,5 миллиард тенгеге жетті. Жыл соңына дейін жалпы сомасы 87 миллиард тенге болатын 25 инвестициялық жобаны іске қосу жоспарланған. Оның 15 жобасы өңдеу өнеркәсібі саласында жүзеге асырылады.

Мемлекет басшысына қаланың тыныс-тіршілігін қамтамасыз ететін нысандар құрылысының барысы туралы баяндалды. Газбен жылыту стансалары мен 3-ЖЭО алдағы жылыту маусымында іске қосылады деп жоспарланып отыр. Олар сағатына

1100 Гкал жылы береді. Бұл елордада жылу энергиясына деген сұранысты артығымен қамтамасыз етуге ықпал етеді.

Бұдан бөлек, қала әкімі әлеуметтік нысандар салу (мектептер, жеңілдікпен берілетін колледжімізді тұрғын үйлер, медициналық орталықтар), ұзаққа созылған құрылыстарды аяқтау, апатты жағдайдағы және ескі үйлерді бұзу, тұрғын үй алаптарын дамыту, қаланы абаттандыру және көгалдандыру жайында айтты. Сондай-ақ биылғы оқу жылында Астанада 11 мектеп

салынатынын, оның төртеуі қазір жұмыс істеп жатқанын жеткізді. «Жайлы мектеп» ұлттық жобасы аясында 2024-2025 жылдары 90 мыңға жуық оқушыға арналған 24 мектеп салынады. Оның 15-і қарқынды дамып келе жатқан Есіл және Нұра аудандарында бой көтермек.

Президент Қасым-Жомарт Тоқаев қаланың әлеуметтік және инженерлік инфрақұрылымын одан әрі дамытуға, жылыту маусымына дайындығына және абаттандыру жұмыстарына қатысты бірқатар тапсырма берді.

ОРМАНШЫЛАРДЫҢ БІЛІКТІЛІГІН АРТТЫРУ МАҢЫЗДЫ



Мемлекет басшысы Экология және табиғи ресурстар министрі Ерлан Нысанбаевты қабылдады.

Кездесу барысында Қасым-Жомарт Тоқаев жана экологиялық заңнаманы жүзеге асыруға және табиғи ресурстарды сақ-

тауға қатысты бірқатар тапсырма берді.

Президент Ірі кәсіпорындардың шығарындыларын азайту жөніндегі жоспардың іске асырылуын, сондай-ақ осы нысандардағы шығарындыларға мониторинг жасау үшін автоматтан-

дырылған жүйе енгізу ісін ерекше бақылауға алуды тапсырды.

Мемлекет басшысы министрлікке қарасты ведомстволық ұйымдардың материалдық-техникалық базасын жақсарту және ұлттық парктердегі орман өрті ошақтарын ерте анықтау жүйелерін тәсірлік енгізу, сондай-ақ орман шаруашылығы қызметкерлерінің біліктілігін арттыру жөнінде жүйелі шаралар қабылдау қажеттігін атап өтті.

Сонымен қатар Қасым-Жомарт Тоқаев ағаш отырғызуға қатысты ауқымды бағдарламаны жүзеге асыру және ретсіз пайда болған коқыс полигондары мәселесін шешудің кешенді тәсілдерін әзірлеу маңызды екеніне назар аударды.

ҰЛТТЫҚ ГИДРОГЕОЛОГИЯЛЫҚ ҚЫЗМЕТТІ ҚАЙТА ҚҰРУДЫ ТАПСЫРДЫ

Мемлекет басшысы Су ресурстары және ирригация министрі Нұржан Нұржігітовті қабылдады.

Кездесу барысында Президент су ресурстарын басқару мәселелері бойынша Орталық Азия елдерімен өзара іс-әрекетті жолға қою маңызды екенін атап өтті.

Министрлікке су шаруашылығы инфрақұрылымдарын кеңірек көлемде жаңғырту, суды есептеу және бөлу жүйесін цифрландыру міндеті жүктелді.

Мемлекет басшысы су ресурстарын тиімсіз пайдалануға және



гидротехникалық нысандардың өлген тозуына қатысты мәселелерді шешу үшін жаңа Су кодексінің уақытты қабылдау қажеттігін айтты.

Қасым-Жомарт Тоқаев Ұлттық гидрогеологиялық қызметті қайта құру және министрлікке қарасты ұйымдарды трансформациялау жұмыстарын аяқтауды тапсырды.



СУ ЖАҢА МИНИСТРЛІК СУ ПРОБЛЕМАСЫН ШЕШЕ МЕ?

Жер шарының 75 пайызын су алып жатса да әлемде су тапшылығы мәселесі бар. Су ресурсы – бізде де өзекті мәселелердің бірі. Жыл сайын бұл проблема оқтын-оқтын көтеріліп, сала мамандары дабыл қағып жатады. Құрғақшылық «жағадан алса», инфрақұрылымдардың ескілігі «етектен тартады». Трансшекаралық су көздеріне тәуелді мемлекет екендігіміз тағы бар. Демографиялық өсім жыл сайын артып келеді.



ТАҒАЙЫНДАУ

Мемлекет басшысының өкімдерімен:

Айжан Болатқызы Шайназарова Қазақстан Республикасы Президенті Әкімшілігінің Ішкі саясат бөлімінің меңгерушісі лауазымына тағайындалды;

Нұрмұхамед Исманұлы Байғараев Қазақстан Республикасы Президентінің Баспасөз хатшысы лауазымына тағайындалды.

Сіз не дейсіз?



Елнұр БЕЙСЕНБАЕВ, Мәжіліс депутаты, Мәжілістегі «AMANAT» партиясы фракциясының жетекшісі:

БІР ҒАНА ЗАҢМЕН МӘСЕЛЕ ШЕШІЛМЕЙДІ

– Биыл құмар ойындар мен бәс тігу қызметтерінің көлемі 40 есеге өскен. Айталық, соңғы екі жылда құмар ойындар нарығы жылжымайтын мүлік нарығын басып озыпты. Ал осы жылдың бірінші жартыжылдығының өзінде ғана халықтың құмар ойындарға жұмсаған шығыны 100 миллиард теңгеден асып жығылған. Оның себебі де жоқ емес. Өйткені қазір елімізде құмар ойындардың жарнамалары кез келген онлайн платформада қолжетімді. Бұл өз кезегінде лудомания дертіне шалдыққан адамдардың қатарын өсіріп, нарықтың осы түрі кеңінен қанат жаюына мүмкіндік беріп отыр. Күні кеше Мемлекет басшысы Қасым-Жомарт Тоқаевтың төрағалығымен өткен Қауіпсіздік Кеңесінің отырысында бұл мәселе тағы айтылды. Лудоманияға қарсы күресте алдыңғы кезекте қандай шара қабылданғаны дұрыс? Бұл туралы Мәжіліс депутаты, «AMANAT» партиясының Мәжілістегі фракция жетекшісі Елнұр Бейсенбаев не дейді?

(Жалғасы 2-бетте)

ШЫҒАРМАШЫЛЫҒЫМ ИДЕЯ МЕН ЭМОЦИЯҒА БАҒЫТТАЛҒАН



МАҢҒЫСТАУ ТУРИЗМІН ТҮЛЕТУ – ӨЗЕКТІ МІНДЕТ



